



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir\_yimyim



tir yimyim

TAPAK 8

PM Modi Gujarat nung sen cr 9,700  
alang project amenoktsütsü

Sumit Nagal nem  
China Visa agütsüogo



VOL. XXIII ISSUE NO. 39 (ADOK 39)

DIMAPUR

KÜPTOKNÜ (SATURDAY)

YIMPOKSÜI (NOVEMBER) 15, 2025

₹ 5.00

## Centre sorkari NE atema tongti süa bilemetsür: FM Nirmala Sitharaman

**Kohima, November 14, 2025**

**(TYO):** India sorkari Northeast atema tenangzükbä agia lir aser "top of policy priority" nung yua lir ta Union Finance and Corporate Affairs Minister Nirmala Sitharaman-i ashi.

Centre-i Northeast nung infrastructure, investments, skill development aser digital expansion atema tongti süa bilemer ta lai ashi.

National Institute of Electronics and Information Technology, (NIELIT) Kohima nung kaketshirtem aser lanurtem den sensaksemdang Sitharaman dang Northeast ya South East Asia ta asüba dak sendakba nung tasüngdangba aika asüngdanga liasü.

Kaketshirtemisa tetsürtem financial empowerment, industries aser digital inclusion indang asüngdang.

"Northeast ya policy tiyongtsü nung lir aser development, skills, investments nung temulung agütsür" ta lai ashi.

Tanü Northeast nung connectivity tashitaitba, digital infrastructure tajungba aser market access ulushia kümogo. Northeast nung infrastructure tsütsü tangar memenepe aliba tangbo highways, airports, digital networks aser logistics nung terenlok lir ta laisa shisem.

AI and robotics putu nung Digital India nung lanurtemi koma shilem agitsü ta asüngdangdang "kaketshirtemi dak iba tejangraba angudang kanga pelar aser iba tangatetba ajanga 2047 tashi nung India renloktsü" ta Sitharaman-i langzü.

Kasa mapang kaketshirtem yimya tamajung mangazüktsüla, talisa drug achiba majizüktsüla. Iba ajanga linük kübok tesem kar nungbo kaketshirtem taküm raksatsür, ta laisa tekümdangtsü olen ka ashi.

Northeast nung cement aser speciality steel nungi renewable energy, green hydrogen aser semiconductors indang industries lapoka inyaka otettsü.

Tanü waterways, transport corridors tasen aser multimodal logistics ajanga Northeast nung industries tetsükdaksü mali kümogo ta laisa metetdaksü.

Northeast nung tetsürtemi financial awareness aser savings atema kechi inyaksüla ta kaketshir kati asüngdangdang "India tsürtemi alemli nungi kibong senotsü achaayanga arur aser tanü maongkatem ajanga financial independence nung temulung agütsütsü nüngdaker. Tetsürtemi aazüktsü, kümzüka ayutsü aser invest asütsü marendaksüla" ta Sitharaman-i langzü.

Tetsür entrepreneurs atema collateral-free loans, higher-interest savings accounts aser PM Vatsalya amala long-term schemes ajanga tanur ka tain aküm tashi nung senotsü aika bendenteter ta laisa shisem.

School aser college jenjang nung AI education ulushitsüla aser kaketshirtemi kara angazükba ajanga technology tasentem temulung ulua benschitetsü ta laisa ashi.

"Assam nung tawa ni Tata Semiconductor ATMP facility semdang aser iba wadang ajanga

Northeast nung lanurtem asoshi maongka aika agütsütetsü. Ni Tata dang Nagaland nung rejutem den sendakteptsü mepishiogo aser semiconductor-based skilling programmes agira NIELIT ajangzüksü" ta Sitharaman-i ashi.

Private telecom operators den külemi BSNL indang 4G aser 5G technologies ajanga meta talang pilar alidak coverage agütsür. 2029 tashi nung renemtsü ta imlaba dang nungi tekarakba inyaka arudar, ta lai ashi.

Union Minister Sitharaman-i anogo asemnü atema Nagaland semdangi arua lir. Lai Kiphire district semdangba sülen tanü Kohima tongogo.

NIELIT Kohima nung Union Minister lia NIELIT Kohima aser Tata Semiconductor Assembly and Test Private Limited tsüngda Memorandum of Understanding (MoU) ka nung sign sütepogo.

Iba MoU nung Director General & Vice-Chancellor of NIELIT Prof. Dr. Madan Mohan Tripathi, Ministry of Electronics and IT, aser Team McIntosh, Vice President &

Head of Manufacturing Excellence and Operations, Tata Semiconductor Assembly and Test Pvt. Ltd. nungeri sign asü.

Sitharaman-isa Army Educational Corps, Ministry of Defence nung personnel nem kulikakettem lema agütsü. Parnok yagi ghonda 540 atema Cyber Security and Social Media Analytics training agia liasü.

Sitharaman-isa SAMARTH ((Students Advancing Mindsets in AI, Robotics, Technology and Digital Hardware) tenzüksü aser Nagaland nung school 9 nem SAMARTH Innovation Kits agütsü.

Union Finance Minister-isa Startups aser kaketshirtem, India AI Lab aser R&D Cyber Forensics Lab ajanga lapokba stall tem semdanga senzü.

Honibarnü Sitharaman-i Nagaland Tool Room & Training Centre (NTTC), Dimapur nung AI Centre of Excellence for Skilling lapoktsütsü aser iba sülen Niathu Resort nung Scheme for Special Assistance to States for Capital Investment (SASCI) Project meyipa reprangshir New Delhi-i apusoa aotsü.

## Centre-i NSCN (K) maneni noktanger

**Dimapur, November 14, 2025 (TYO):**

Ministry of Home Affairs (MHA)-i National Socialist Council of Nagaland (Khaplang) maneni noktangba metetdaksüogo.

NSCN (K) aser parnok

kongsangtem aser parnok kübok telok ajak Unlawful Activities (Prevention) Act kübok "Unlawful Association" ta maneni züngshir ta MHA-i sangdong ka nung ashi.

## Union Minister tenüng nung State Dinner ayongzü

**Dimapur, November 14, 2025 (TYO):**

Chief Minister, Dr. Neiphiu Rio aser pa kinungtsü Kaisa Rio nati Union Minister for Finance and Corporate Affairs, Nirmala Sitharaman nem State Dinner ayonga agiogo.

November 14, 2025 nü State Banquet Hall, Chief Minister's Residential Complex, Kohima nung iba sentong agi.

Chief Secretary, Sentiyanger Imchen, IAS-i Nagaland sorkar tenüng nung Union Minister pelashishia agizük.

"Union Finance Minister Sitharaman-i tang agi tasembenbuba atema Nagaland semdang. Yashi lai meta talangtuba pilar aliba Kiphire district semdangba ajanga lai Nagaland state aser nübortem asoshi bilemetsüba sayur" ta Sentiyanger-i ashi.

Nagaland CSR and Investment Conclave 2022 nung la adenba ajanga lenmang lapoktsü aser iba ajanga education, healthcare aser livelihood wadangtem nung asenok ajangzüksüsa CSR

initiatives aika tenzükogo ta Sentiyanger-isa ashi.

"2022 küm lai semdangdang unbanked blocks 27 liasü ajisüaka Wakching, Mon District nung Nagaland Rural Bank lapokba ajanga tang tashi nung blocks 18 dang kümogo. Taoba mapang lai semdangdang Chief Minister's Micro Finance Initiative tenzüksü aser tanü iba ya Nagaland nung aluyimertem, entrepreneurs aser tetsürtemi aniba Self- Help Groups kanga ajangzükbä mapa ka kümogo" ta paisa metetdaksü.

"Union Finance Minister-i Nagaland nem mulungso Special Assistance to States for Capital Investment (SASCI) kübok senotsü lemezüktsüba atema pelar. Iba ajanga Nagaland nung infrastructure mapatong nüngdakbatem inyakteter aser maneni item mapatongtem inyaksü atema küm ka masü saka mapang teimba agütsütsü mepishir" ta Sentiyanger-isa ashi.

State Dinner nung shilem ka ama Task Force for Music and Arts sobaliba sentong ka agia liasü.

## Sitharaman-i Kiphire nung ITI centre lapoktsü

**Dimapur, November 14, 2025 (TYO):**

Union Finance Minister and Corporate Affairs, Nirmala Sitharaman-i anogo ananü atema Kiphire Aspirational District semdangdang Saramati tobur ajungba aser Naga nung sobaloiba takar ngua kanga pelar ta ashi.

Public Ground, Kiphire nung la nem tetushi agütsüba sentong ka nung lai Naga nungeri oboula nunger sobaliba aser inyaksangshi wazüka ayuba atema tenüngsang agütsü.

Thanamir nung kümshia

Apple Festival amungba angashia nükshir. Kiphire nung ali rongsen aika lir aser rongsenketzüng renloktsü teinyaksü aika lir ta Sitharaman-i ashi.

Union Finance Minister-i Kiphire nung Industrial Training Institute (ITI) centre ka lapoktsü aser kaketshirtem den ajurutepa sensaksem. Laisa Anganwadi Workers, Helpers aser tanurtem den ajurutepa sensaksem mapang ka agia liasü.

Idangji lai State Bank of India (SBI) ajanga agütsüba Cheque agütsü aser Central Schemes

inyakba aser Aspirational Kiphire District atema senotsü agütsüba ajanga inyakba maparen meyipa reprangshi.

Sentong nung Social Welfare Department Director Tosheli Zhimomi menden liasü aser Fire & Emergency Services, Home Guards & Civil Defence Advisor S. Kiusumew Yimchunger-i anir tongti ketdangsurtem aden.

Nirmala Sitharaman-isa BJP Nagaland indang Pungro-Kiphire Mandal Atmanirbhar Bharat Sankalp Campaign Vidhansabha Sammelan nung o jembi.

## Centre-i Myanmar, Mizoram, Nagaland, Manipur sendaktepba highway sangdongtsü

**Imphal, November 14, 2025 (Agencies):**

Centre sorkari Myanmar den arrtsülen aser Nagaland, Mizoram, o Manipur state tem sendakteptsü atema gari lenmang mapatong aika inyaker.

Minister of State for Road Transport and Highways, Government of India Ajay Tamta-i tesüiba anogo ananü tashi Myanmar arrtsülen gari lenmang yangluba tesemtem semdanga senzüogo.

Kilometer 658 talang Indo-Myanmar Border Road Project tang feasibility assessment kübok

lir aser kobi melii National Highway tasen ka ama sangdongtsü ta Imphal nung Ajay Tamta-i osangbener dang ashi.


Manipur-i Nagaland den lenmang sendaktepa single-lane nungi two-lane standards agi ajungketer. Iba ya tongtipang lenmang asem- Ukhrul nungi Jessami (NH-202, 156 km), Mao nungi Imphal (NH-02, 97 km), aser Maram nungi Peren (NH-129A, 104 km) lir.

NHIDCL-isa Mao aser Senapati tsüngda four-lane Greenfield alignment yangludat

aser iba ya Senapati district ajanga Nagaland den interstate connectivity tajungba kümdaksütsü atema lir ta MoS Ajay Tamta-isa ashi.

Assam aser Manipur tsüngda highway corridors asem- Imphal nungi Jiribam (NH-37), Yaingangpokpi nungi Finch Corner (NH-202), aser Tamenglong nungi Mahur (NH-137) den Churachandpur nungi Tuivai (NH-102B) aser Maram nungi Peren (NH-129A) FY 2025-26 nung renemtsü alizüng lir, ta paisa metetdaksü.

## Tribal nisung mezüngmeshi masütsüla: Padma Shri T. Senka Ao



Padma Shri T. Senka Ao-i Ao (Naga) oshi ajungketa wazüka ayuba wadang nung shilem tulu agiba reprangteta Nagaland University-i pa nem aküm tetushi agüja nünyu kulikaket ka Vice Chancellor, Prof. Jagadish K. Patnaik ajanga senpettsüdang tangokba noksa nung angur.

**Mokokchung, Yimpoksüi/Nov. 14 (TYO):** India linük ya wako (flag) ka aser temzüng (constitution) ka dang, aji saka, India tesem aika nung tribal nisungtem 2nd class senso amai beshir, wako ka temzüng ka amaji tebendang makai senso temang sakuku beshitsüla aser ibai kaketrijutem nungi tenzüka kanga junga angatetdaksütsüla, ta metetdaksü. Iba o ya tsürabur Padma Shri T. Senka Ao-i Nagaland University, Lumami nung Janjatiya Gaurav Diwas 2025 sentong akadang metetdaksü.

Padma Shri Senka-i ashiba agi, British nungeri India lima yimsü asüadang, parnoki (British nungeri) 'tribal nisungtemji pei li, pei sobaliba, pei yimsüsübaren aser nokinketerem lir', ta ashi, aji süaka, parnokia tribal nisungtemji tangar memenepba kin (backward) ka ama züngshi, ta metetdaksü.

Aji oda, 'India nunger nüchiso ngur külena, parnokia tribal nisungtem asoshi kaketi

riju, mozüki aser terenlok tapu tapu inyaksüaka, tanü tashi parnokia tribal nüburtemji backward amai dang züngshir'. "Tribal nisungtemji 2nd class senso amai mamshitsüla", ta pai ashi. "Tribal nisungtemji India nung senso kaka lir, anungji, mezüngmeshi masütsüla", ta paisa ayimoktsü.

Ministry of human development aser UGC ajanga university renloktsü asoshi mapatong tapu balala inyaksü aser itemji shisatokdena aser asüngtetshir ang inyaka aotsü, aji oda, itemji inyaka aodang tribal pur sobaliba aser beshia aruba yimsüyimbongtem mesamadaksüi wazüka ayutsüla, ta ashi. "Tawa-tanü terenlok balala ajanga asen sobaliba senmangtem meraksadaksütsüla", ta paisa nenshia liasü.

Yangi tesayurtemi shisa aneti arurtem dang tribal sobalibatem kanga junga wazüka aser kümzüka ayutsü aser itemji angateter yoktsüsa tesayuba

agütsütsüla aser shiluyimertemia yamaji angazüker aotsü merangtsüla ta pai ajungshi. "Tribal nisungtemji pei sobaliba mangazükra asenokji tesamaba kin ka akümtsü, kechiyong kin ka shisangbaji sobaliba ajanga dang lir aser sobalibaji kin ka maitsü (identity) lir", ta paisa shisem.

Iba sentong nung N.U Vice Chancellor, Prof. Jagadish K. Patnaik-i jembidang, tribal maitsü (identity) süiren tamentakdak aser iba tsütsü tashiyim balala ajanga atsünga aruba tekümdangtsü, sobaliba aser yimsüyimbong aser asenok libaliru wazüka ayutsü tongtibang indang, tawa-tanü lokti temelenshi den tanga tatsütepbatem, lokti nung temelenshi adoktsü asoshi lenji otepa aroki mulungba nung külemi putepa alitsü nüngdakbatem, yimden atsü atena nüchiso jenjang asadangba, yimjung aser iba dak sentakba angatetba nung shisatokdena shisashirtemi iba onük aroka ia shisa lemsateptsü ayongzüik.

Padma Shri T. Senka Ao-i Ao (Naga) oshi ajungketba aser wazüka ayuba nung shilem tulu agiba reprangteta Nagaland University-i pa nem tetushi agüja nünyu kulikaket (certificate of honour) ka senpettsü. Iba sentong nung N.U PRO, Peter Ki menden liasü aser Janjatiya Gaurav Diwas luden nung Tayonger aser Assoc. Prof. Dr. Sandeep Gupta-i tarur ajak pela-a agizük aser Asst. Professor (Tribal Research Centre) Dr. Yamsani Srikanth-i tepela o lemsatep.

## Tanü Territorial Army recruitment rally agitsü

**Dimapur, Yimpoksüi/Nov. 14 (TYO):** Territorial Army recruitment rally ya November 15, 2025 nü Bhagat Stadium Rangapahar, Dimapur nung alitsü, ta 113 INF BN (TA) Rajput, Dimapur sangdong ka ajanga metetdaksü.

Reporting mapang ya anepdang 4:30 ako alitsü.

Rally ya Soldier (General Duty), Clerk aser Tradesmen

atema alitsü. Iba rally nung arishi küm 18 nungi 42 tsüngta alirtemi shilem agitettsü. GD asoshi tazüngba Class 10 pass (45% aggregate, 33% each subject) asütsüla, Clerk atema stream mashi nung 10+2 (60% aggregate, subject shia 50%) asütsüla aser Tradesmen atema Class 8 mesüra 10 (as per trade) züngser alirtem asütsüla.

Physical standards tsütsü tar 160cm (regional relaxations alitsü) temang tuozük seret 50 aser physical fitness test nung minute 5 aser second 45 tsüngta 1600 m asemstsü aser Pull-ups 6 ben asütsü.

Nagaland nungi lanurtem Territorial Army nung adentsü ayongzüker, ta 113 INF BN (TA) Rajput, Dimapur sangdong ajangasa ashi.



Queen Mary Higher Secondary, Mokokchung pur mezüngbuba Fete Day sentong "Marian Fest" omen dak rangloker parnok school kilem nung 14th November, 2025 nü akaba mapang tangokba noksa nung angur. Iba sentong nung Mokokchung Deputy Commissioner, Ajit Kumar Verma IAS liasü aser sentong nung Senior Superintendent of police, Mokokchung Municipal Council Chairman-i anir MMC councilor-tem, school board member-tem, ward balala nungi ketdangsürtem aser yangji azünger tsüraburtem arua shilem agia aden. Mokokchung, 14th November, 2025.

## Kohima nung National Clean Air Programme indang awareness sentong agi

**Dimapur, Yimpoksüi/Nov. 14 (TYO):** National Clean Air Programme indang awareness sentong ka "Act Now: No Planet B - Every Choice Matters for Our Earth" omen nung ajemdaker Forest Colony Community Hall, Kohima nung November 13, 2025 nü Ward No. 17 ajanga Kohima Municipal Council (KMC) den lungjemer ayongzüka liasü.

Shisalen sayur Rongsenben Longkumer, Junior Scientific Assistant, Nagaland Pollution Control Board ajanga "Ambient Air Quality" onük nung jembia, kong Ministry of Environment, Forest and Climate Change ajanga January 2019 nung tenzüka National Clean Air Programme (NCAP) ya mopung menenba azüoktsü asoshi linük ajanga nung inyaksüba tasa lir, ta ashi.

Sentong nükjidong ya 2017 ya base year ama 2026 tashinung PM10 aser PM2.5 levels ya 20-30% agi ajemdaksütsü nükjidong lir.

Gari nungi mokozi adokba, lenmang nung aoyi, industrial

pollution, jana arongba aser ki o jen yangluba aser raksaba aoyi tem ya mopung menendaksüba sources tongti tem lir, ta lai ashi. Local bodies/gram panchayats/councils temi Plastic Waste Management Rules of 2016 aser National Green Tribunal kübok jana marongtsü ajungshitsüla t alai metetdaksü.

Nagaland Pollution Control Board nungi Junior Scientist Assistant, Y. Hanpong Kongyak iba sentong nung shisalen sayur liasü aser pai "Lifestyle for Environment" onük nung jembia liasü.

Ajaki yaritepa, nüburtemi shilem agia linük tesem ajunga nung mopung temürek lidaksütsü NCAP mangdang lir.

Iba sentong nung Peter K. Rengma, Chairman, Forest Colony Council menden liasü, Khrielievi Chüsi, Deputy Chairman, KMC ajanga pela agizükba o jembia, Hormila-i sentong tenzüka sarasadem aser Nzinimo Lotha, Vice Chairman, Forest Colony Council ajanga melepzüng o jembia liasü.



30 Alongtaki Assembly Constituency nung nüburtem Congress party nung arua adenba 'Mass Joining' sentong ka Longchem nung akadang Nagaland Pradesh Congress Committee Tir & Lok Sabha MP, S. Süpongmeren Jamir-i jembiba mapang tangokba noksa nung angur. Iba sentong nung 30 Alongtaki A/C pur Congress nung arua adener parnok 361 liasü. Mokokchung, 14th November, 2025.

## IITF 2025 nung Nagaland Pavilion semzükogo

**Dimapur, Yimpoksüi/Nov. 14 (TYO):** Bharat Mandapam, New Delhi nung November 14, 2025 nü 44buba India International Trade Fair (IITF) tenzükogo aser Joint Secretary, Micro Small & Medium Enterprises (MSME), Government of India, Mercy Epao ajanga yangji Nagaland Pavilion semzükja liasü.

La meina Joint Resident Commissioner, Nagaland House, New Delhi, Sharon Longchari; Joint Director and Pavilion Director, Industries & Commerce Department, K. Hekavi Francis aser department ketdangsürtem, OSD Planning & Transformation Department, Thomas Thailu; Senior Manager NHD, Koko Metha; Registrar NHD, Anup Rawat aser UDA NHD, Atale Kezo

nungertem iba sentong nung dena liasü.

Joint Secretary, Mercy Epao den ketdangsür temi State Pavilion nung amenoka aliba stalls tem semdanga liasü.

Lai iba exhibition nung adener den jembidang Ministry of MSME ajanga branding aser design schemes nung teyari agütsüba agitsü ayongzüka liasü. Iba pavilion nungya handlooms, handicrafts, chiyongtsü, naro takong tem State nungi bener oa lir.

Anogo 14 trade fair ya November 27, 2025 nü tembangtsü, kong United Arab Emirates, China, South Korea, Iran aser Egypt densema linük 12 nungi shilem agir.

Uttar Pradesh, Rajasthan, Maharashtra, aser Bihar ya partner states aser Jharkhand ya focus state lir.



## NAGALAND HEALTH PROTECTION SOCIETY

### CMHIS (EP) AJANGATAJANGZÜK ANGURTEM ATEMA TONGTIBANG TEMETETTSÜ

CMHIS (EP) ajanga sen Rs. 20 lakh teküpbok tajangzük angutsü pur ajak dang iba sentong nung Medical Oncology Packages kübok Immunotherapy / Targeted Therapy atema küm ka nung kibong shia sen Rs. 10 lakhs dang lateta yutsür ta Nagaland Health Protection Society-i metetdaksür.

Iba lateta yutsüba sen dak tali endokbajibo peisasa enoksemtsüsa adoktsü.

Temetetnüba aser tasüngdangnüba lira imlibilema **Toll-Free Helpline**  
yangi metetpelanangma - **1800-202-3380**

## Congress nungi Naveen Yadav-i Jubilee Hills bypoll kokogo

**New Delhi, Yimpoksüi/ November 14 (Agencies):** Congress candidate V Naveen Yadav-i Hokolbarnü Telengana nung Jubilee Hills bypoll kokogo. Pai vote 24,729 agi Bharat Rashtra Samithi candidate Maganti Sunitha Gopinath koka liasü.

Counting round terbuba sülen Election Commission of India (ECI)-i result sangdonga liasü. Jubilee Hills menden ya state yimtiba Hyderabad nung lir aser iba menden atema Congress aser BRS na indang indanga toktepa liasü.

Congress candidate yagi vote 98,988 angu aser Maganti Sunitha Gopinath-i vote 74,259 ngua liasü. BJP candidate Deepak Reddy Lankala-ia vote 17,061 ngua pa tasembuba jenjang nung liasü.

Kotla Vijayabhaskar Reddy Stadium nung vote azüngba tesem nung round tenetbuba sülen Congress candidate Vallala Naveen Yadav, BRS candidate Maganti Sunitha dang



nungi vote 19,600 agi timba liasü, ta HT-i taoba mapang metetdaksür liasü.

Sunitha ya MLA asür Maganti Gopinath kinungtsü lir. Maganti June ita asüba ajanga iba election agitsüsa aküm.


November 11 nü election agiba mapang Jubilee Hills constituency nung voter aikabo maru aser voter lakh 4.01-i (48.42%) dang vote agüja liasü.

Vote ya Bihar Assembly elections den külemi anepdang 8 ako nungi azüng tenzük.

Bypoll ya Jammu and Kashmir nung Budgam aser Nagrota, Mizoram nung Dampa, Rajasthan nung Anta, Jharkhand nung Ghatshila, Telangana nung Jubilee Hills, Odisha nung Nuapada, aser Punjab nung Tarn Taran nung agia liasü.

Rajasthan nung Congress nungi Pramod Jain Bhaya-i takok nguogo. Pa BJP candidate Morpal Suman aser Independent candidate Naresh Meena na den toktepa liasü.

## PM Modi Gujarat nung sen cr 9,700 alang project amenoktsütsü



**New Delhi, Yimpoksüi/ November 14 (Agencies):** Ato Kilonser Narendra Modi-i Honibarnü Janjatiya Gaurav Divas amungba mapang Gujarat semdangtsü aser sen crore 9,700 alang project tem amenoktsütsü.

Ato Kilonser office sangdong ka ajanga ashiba agi, PM Modi Dediapada nung Bhagwan Birsa Munda sor küm 150 ajungba benjung nung shilem agitsü aser iba mapang pai tribal tem ajungkettsü aser yimdak yimtsüngtem nung

infrastructure tajungba küma yanglutsütsü atema terenlok maparen balala atema nüngshilong azüngtsütsü.

Pradhan Mantri Janjati Adivasi Nyaya Maha Abhiyan (PM-JANMAN) aser Dharti Aaba Janjatiya Gram Utkarsh Abhiyan (DA-JAGUA) kübok ki 100,000 asüba Grih Pravesh nung pai shilem agitsü.

Paisa, sen crore 1,900 alang Eklavya Model Residential Schools (EMRS) 42 lapoktsütsü, koba tribal kaketshirtem atema asütsü.

Maneni pai Multi-Purpose Centres 228, Assam Medical College, Dibrugarh nung Centre of Competence aser tribal tem sobaliba aser senmang wazüka ayutsü atema Tribal Research Institute (TRI) building Imphal, Manipur lapoktsütsü.

Iba den bendenloksema Ato Kilonseri Gujarat nung tribal tem aliba tesem tesendaktep tajungba kümdaktsütsü asoshi tribal district 14 atema bus 250 tenzüksütsü.

Maneni Ato Kilonseri tribal tem aliba tesem tesendaktep tajungba kümdaktsütsü asoshi lenmang tasen km 748 atema aser DA-JAGUA kübok Tribal Multi-Marketing Centres (TMMCs) 14 atema nüngshilong azüngtsütsü.

Paisa, sen crore 2.320 alang Eklavya Model Residential Schools tasen 50 atema nüngshilong azüngtsütsü, aser iba ajanga sorkari tribal tanurtem nem jenjang aketba kakets shisatsü agütsütsü atema bendanga agütsür aliba sayur.

## BSF-i Punjab nung arrtsü adena shibelenertem nokdang

**New Delhi, Yimpoksüi/ November 14 (Agencies):** Border Security Force (BSF)-i Punjab nung India aser Pakistan na arrtsü nung shibelenertem inyakyim aika nokdangogo. Parnoki Amritsar aser Ferozepur tesem nung Pakistan nunger indang drone, prangbong injang aser temesepba mozü puogo.

BSF ketdangsürtemi ashiba agi, itdangitertemi osang agütsüba dak ajemdaker meita aoba mapang item osettem ya pua liasü, aser iba ajanga BSF pur tali kümküma akümba, aser Pakistan nung amendaker inyaksangshiba drone network ajanga amokmerenba nokdangtsü asoshi tashi taitba akümba sayur.

Mezüngbuba ken o nung itdangitertem osang dak ajemdaker BSF sepaitemi Ferozepur district kübok Kamal Wala yimtsüng anasa alu ka meita aoba mapang DJI Mavic 3 Classic drone ka nguteta liasü, koba shibelenertsü atema amshiba asütsü ta bilemer. Iba drone ya arrtsü atsü anasa alu ka nung

nguteta liasü. Tanga ken o ka nung kasa anogo BSF sepaitemi Ferozepur kübok Raja Rai yimtsüng nung alu ka nung pistol ana miima yur lia nguteta liasü. Ketdangsürtemi ashiba agi, pistol ya drone agi tsükdatsüba mesüra shibelenertemi bener aruba asütsü.

Kasa mapang nung BSF surveillance-i Amritsar nung anüng nung tayimtsü yimzüba lazükba sülen temesepba mozü pua liasü. Sepaitemi Pandori yimtsüng anasa tesem ka meita aoba mapang heroin seret 1.664 ngutetogo. Mozü ya kanga junga aleper agütsütsü asoshi renemer liasü.

BSF ketdangsürtemi ashiba agi, item oset balala putetba ajanga Pakistan nung amendaker alirtemi drone amshia India-i prangbong aser temesepba mozü yoktsü merangba sayur. Parnokisa, arrtsü adena inyaksangshirtemi tasa tasen amshia inyaksangshiba nokdangtsü asoshi sepaitem kanga junga renema lir ta ashi.

## Delhi blast: Kiralongrartem email drafts ajanga tongtepratep

**New Delhi, Yimpoksüi/ November 14 (Agencies):** Red Fort lendong dak sendakba nung ken o bushisüngdangba sülen, terror module züngsem shirnok dang meita atadar, parnoki parnok inyakyim meputetdaksütsü atema email tem draft ama yua tongtepratepba ngutetogo.

Bushisüngdangertemi ashiba agi, Dr Umar Un Nabi shibai Red Fort anasa apokba gari ania liasü asütsü ta temulung melemer bilemer pa densema Dr Muzammil Ganaie aser Dr Shaheen Shahid nungeri module ajaki amshitetba email account ka dang amshia tongtepratepa liasü.

Parnoki email tem yoktsü melena draft ama save süa ayu, ta police source kati ashi.

Züngsemtem yagi kasa account yagi log in asütsü aser draft ya azüngba sülen indangjisa delete asütsü ta inyak, aser iba ajanga parnok tongtepratepba digital trail kecha metoktsü, ta source yagi ashi.

Parnok sensaksem memetetdaksütsü atema iba atasa ya amshia liasü, ta police-isa shisem.

Ketdangsürtemi ashiba agi, iba tasa amshiba ajanga module yongtsü nung kanga kümdanga sentong yanglur inyaksangshiba sayur, aser iba yagisa putettsüba channel tem dak memetaloki meputetdaksüi tongteprateptsü teyari

agütsüogo.

Iba telok nungi züngsemtem Threema ta nüngja agütsür Swiss communication application ka aser iba amala mesükba app tem ajanga sendatepa aruogo.

Parnoki iba encrypted messaging app ya sentong balala yanglutsü aser bendanger handler tem den tongteprateptsü atema amshia liasü, ta police-i ashi.

"Tanga messaging sabangtem ama Threema amshitsü atema züngoksemtsü asoshi phone number mesüra email ID menügdaker aser ibayongji iba app amshirtem putettsü kanga tasak," ta source kati ashi.

App yagi tamshir ajak nem unique ID ka agütsür, koba mobile number mesüra SIM card den sendaktepa mali aser private servers nung run asütsü atema option dena agütsür.

Bushisüngdangertemi aija aliba doctor tem yagi meputetdaksüi tongteprateptsü atema private Threema server ka amenok asütsü ta bilemer. Iba server ya Delhi lendong dak sendakba nung tongtibang kuli kakets, map aser tesemtem lemsateptsü atema amshia liasü.

Threema yagisa, anatsülen nungi message tem delete asütsü melar aser metadata rizünga mayur asünung forensic retrieval inyakyim tebenjaba kümdaktsür, ta source-isa shisem.



## TIR YIMYIM YIMOBILEM (EDITORIAL)

DIMAPUR

KÜPTOKNÜ

YIMPOKSÜI 15, 2025

### Asenok tambu-tantsü ama alitsüla

**N**übener kibong nung tambu mesüra tantsü asütsüba maongka dang nungibo khuret tuluba lir, kechiyong tsüraburtem mapa inyakdang tantsü aser tambui kidang kibong nung tenu nungertem yaritsüsa akümer. Aji oda, karbo tenu nunger yaritsü mechi kaketrejuia onüseta mao anener aser kibakeyiia yakta mouteter. Iba amaji pei tsürabur aser tenu nunger meimba agi timtem takoksa arema tenla agütsübatem nübener kibong nung tambu aser tantsü taküm nung aika ataloker. Kasaji, nübortem rongnunga Tsüngremi shirnok dang taochi tulu sayua mezüng tanela tekümtet lenmang sayu aser shisa tenük lapoka kaketshisatsü angazükdaksü, iba kinji aser item purtemji par külem kintem aser nübör rongnung tambu-tantsü akümer, anungji parnok nem agütsüba taochi aser temoatsüji kidang kibong nung tenu nungertem den lemsatepa nüböjong kuma indaktsütsüba tambu-tantsü mapa asütsü. Aji oda, kidang kibong nung tambu-tantsü pei tsürabur aser tenu nunger memeim pei ajung dang asaa lira, pa mesüra laji tambu-tantsü mazü ta tangari jembitsür. Kasaji, tanü Naga lima nung asen Ao kin ya Naga kintem rongnung Tsüngremi tambu aser tantsü khuretji abentsü nunglokja lir, anungji asenokbo tangar dak imlaa melii mapa nung asen tama saka tagitsü nungbo tangar tama südaksüba tangatetba aser jakla dener, anak khen, Naga lima yanglushi tenzüksü mapang ka agi menepa aruogo. Aotsür Aoer nem Tsüngremi enoktsüba shisatsü tajung kaji, Naga lima nung kong südirsüaka, kong nübortem asoshi teyari nüngdaker, yangji oa lia tenzüksü asoshi mulungsua apusor aser temulung agüja tenzüker. Aji oda, asen tsürabur mapang Yisu temeim osang tajung metetdaksütsü asoshi pei kidang anisüngzüka melitet, tetsüng agi Naga lima tesem balalai apusoa ao aser nübortem mulungjang aser parnok sobaliba amang agi sangwa kümtsü. Kasaji, kaketshisatsü angazükba nunga, talangka mazüng saka zülutsü aser azüngtsü meteta akümba agi teperi kümer, iba tashi aser temoatsüji Naga nunger kinungertem nem agütsütsü asoshi timtem tetsüba ajak tizükteta leptepa tsüngtepa alidak oa shisa tenük lapoktsü. Tanüa asen kin nungi lanurtemi pei alidak Naga lima tesem balala nung pei mapa dak alia oagi Naga nunger nüngdakba purtem yariba angur. Atangji, asenoka tambusü aser tantsüsü agi mazü tashimait aika lir, saka ano tajung kaji asenok dak nungi tangar tenzüknüba aser meimnüba shisatsübo magieni lir. Ibaji tanü tashi Ao kin dak aketba tashi, strength, asütsü. Ibaji meteta, asenokbo Naga kintem rongnung par denbo kanga jungteptsü aser par denbo tera dang jungtepyonga kecha masü ta bilema melii, Naga kin ajakji asen tenu, asen kinunger aser parnok madak asen tambu aser tantsü ta angateta Naga kin ajak den kasasa jungtepa alitsü merangtsüba Tsüngremi asen nem nungloktsüba mapa asütsü. Atangji, tanübo tashitemetet aser ali rongsen nung asen Ao kin temaba, tajungba aser takarba masütsüa akok, saka ochi o kaji asenoki tama Yisu taochi angu aser A,B,C aser 1,2,3 ta azüngba aser züluba zülujangtema asenoki tama angu aser angazük, ibayongji Naga kintem rongnung asenok tambu aser tantsü akümer, iba nung jagi asenok aienhitsü makoktsü. Idakji maongka aser temoatsü dang masü saka khuret dena lir. Ajisüaka, asenoki aiben maongka aser temoatsüji shiteta agir khuretji toktsür, iba jagi maongka aser temoatsü agi magishi akümer. Iba ama kin kati kodaser tangar adianu kintem tsüngdang nüktapangtaa sayutsü ? Kodaser kar ayongloker kar anemtsü ? Kodaser mashilen nungi mapai aitsü merangtsü ? Kodaser ochimashilen nungi takar kuma sayutsü ? Kodaser tashiyim aser tim masübalen nungi akoktsü meranga sayutsü ? Itemji nübener rongnung tambu aser tantsü inyaka sayutsüba mapatem masü. Asenokbo kin ajak den kasasa jungtepa alitsüba asen tangatetba aser asen nübö nüngdakba tesem nung, len tatsü-talang ta mali, kecha atsüayonga melii, ya kü mapa, ni aotsüla ta mulungtettsüba asen nem Kibubai nungloktsüba mapa ta agizüktetsüla. Yangji tajung ajak keta lir.

## OLEMSABANG

### Rev. Dr. E.W. Clark ya Theology mazüng-ser Ao limai aru asü?

Rev. S. Temjen Longkumer, Chümoukedima

November 10, 2025 Tir Yimyim Olemsabang nung Adianu kati Arogo, ABAM aser Pastortem nem tajungshi aser temelenshi agütsütsü züluba nung mezüng shilem point No. 3 buba nung yamai zülua aliba angu. "Rev. Dr. E.W. Clark ya Theology zünger asen limai aruba masü."

Iba orenji azüngdang kanga aoksa aser süngmanga bilemogo. Aser aji shitak asü nungbo pa taküm aser mapatem tsütsülen asen Aor tangatetbaji tera balaka kumadoktsü südi ta arentaka bilemba agi ibai metonshitsütsü nükjidong nung ya zülur.

Adianurtsür Tiala Imcheni züluba kaket "Ao kin dangi Khristan Yimsü Aruba" Tapak 452 nung Rev. Dr. Clark ya Amerika nung nungtuku Theological Seminary (College) ana nung azüngba indang zülua lir. Aser idakji azüngdang pa M.A degree angu. Amerika nung tazüngba (Education) degree agütsüba inyakyimji asen lima inyakyim dang nungi balaka lir. Dr. Clark M.A degree angubaji Secular Arts Degree masü, saka aji M.A. Theology Degree lir. Aser aji B.D. mesüra M.Div degree ngur kelen dang M.A Theology azüngtsü. Ya post Graduate degree lir.

Tali rajema angatetsü asoshi ni ajangshiba ka shisemer. 1973 - 74 nung ni ABAM mapa nung study leave agir CBCNEI Scholarship agia U.S.A. nung American Baptist Seminary ka nung azüngdang onok classpurtem courses / subjects ajak kasadang züngaka shirnoki Thesis mezülü parnoki Master of Religious Education (M.R.E) degree mangu, saka shirnoki talila Thesis zülü parnoki M.A. Theology degree angu.

Anungji Dr. Clark M.A. degree angubaji Secular degree masü ta jangjashitsür. Aji dang masü ano nungtuku University ana nungi Doctor of Divinity agütsüba indang kasa kaket tapak 452 nungjisa shia lir.

Yamaji asen Ao kin tia akatsü agi asenok dangi aruba Missionary Rev. Dr. E.W. Clarkji Tsüngrem O azüngba aser metetba nung mongin aser takotet ka liasü ta meteta pa dang peladi aser Tsüngrem tenüng sangdi.

## Lokti Menen

I. Zülü Pongen

Lokti menen ta süra ibai züngdang mezüngdangma lir. Saka item nungi kanga tongtibang kar oda yabosa ta bilemba kar lemsatepnür. Yagi alima sensak tiai bener arutsür, kibong yaita kümdaktsür aser tanela tashi kongshia ibala ama temenen indang kar shisadangdi.

Arogo, yimden aser lokti senden balalai sen lenmang bushiba nungi tim masüba kar ajuruba indang tera shisemer.

Lokti senden shiaji sen dak amendaka lir, membership nungi tenzüker ano sen arulen lenmang bushir idangji sen bushibayim nung lokti menenba kija kibong timtemdaksüba jenti ataloka arur. Ajak tim amai, saka ajakbo kibong ajakibo makoker, anungji, lokti senden koba südir süaka, lottery aika adoker kangshia lemshia ayokba ka. Ano calendar yanglua kabosa-kabosa ta yoka aoba/aruba, ano osettsüset tapu balala jenti ki tonga lemja aruba yimya, Arogo aser CYE amala lokti yagibo khenyongi yamala yimya ya mebenshitsüla. Ya tamangba yimsü den mapet.

Arogo nung envelop tali arur, arogo aser mungdang dak sentakba school fund saru, college envelop tapu balala aser ano arogotem tenla ki asüba coupon-tem aser lottery etc. Government tenzükerbo koba tesemi pa/la odir, tenla ki asüba nung densemer, pei yimtsüng aserpei alidak town item ajak nung tenla ki asüba ajurur. Itemibo maitoktetba tenla lir, saka tilatari coupon, lottery aruba item yabo meyanglu tajungba, pei sasep nung dang yanglutsüla saka tangar dak imla-a inyakba yagi alima menener. Mapabo tajung ama saka onsaraba yagi nübortem menentsür.

Ano, Jubilee - Golden jubilee, Silver jubilee, Platinum, aser Centenary etc. kechi telok südir süaka item ajak ya munga arur. Israel nunger dak ajizüka amunger asünungji, kokra Lai nung shia aliba ama Golden jubilee (50 years), Centenary jubilee (100 years) dak alaka 25 & 75 years jubilee yabo alima tera anizüngzüktetsü asoshi mamung tajungba, kechiaser item ajak nung ya sen sentaka lir.

Thanksgiving - Thanksgiving tetezü 'Tsüngremer temoatsü asoshi tenüngsang agütsüba lir'. Ibai sen lenmang bushiba yimya nung mamshitsüla. Saka telok tilala ajaki oda union tsür thanksgiving, sarasadem telok thanksgiving yamalabo mamshi/mali tajungba. Ibaibo Arogoi amshiba tapetba lir.

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

## Uttar Pradesh nung pastor densema Khristanpur ana tepuokdaki yok

**Lucknow, Yimpoksüi/Nov. 14 (Agencies):** Protestant minister ka densema Khristan anati Uttar Pradesh nung Hindu nunger nisung 150 tamangba yimsü melendaktsütsü merang ta tai tongloksüba sülen court kati tena judicial custody nung ayutsü obendang agütsü.

Pastor Rajesh Kumar aser ano tamanger Kundan na November 9 nü Nepal arütsü anasa Shravasti district kübok Bhayapurwa yimtsüng nung Deobar sarasadem sentong agiba mapang police temi apu.

Tena den ano Shakha aser Ravi nunger anema Uttar Pradesh indang anti-conversion law tesashi kübok ken o benok, saka Shakha aser Ravi ya ano mapu.

Police temi Temeshi Laishiba, Khristanpur zülubanglu, posters, identity cards, baptiba kulizüng kaket, bank passbooks amala "incriminating documents" ngutetogo aser ibai lokti tulu tamangba yimsü melendaktsütsü merangba kuli lir ta ashir.

District Superintendent of Police Rahul Bhati-i osangbener dang ashiba agi, tai tonglokja alirtemi makamaiter tem dak tenük yoka parok nem chiyongtsü aser senotsü teyari agütsü.

Parnok ket nungi bank passbooks 21 ngutetba ajanga tamangba yimsü melendaktsüba nung amshiba senotsü tsüngsü putettsü, ta pai ashi.

Uttar Pradesh ya

Khristanpur reshikangshia amshiba tesepe ka kumogo, talisa Hindu bhukumba Bharatiya Janata Party-i yimsü asüba sorkari 2021 küm Uttar Pradesh Prohibition of Unlawful Conversion of Religion Act benokba sülen tamajungba akumer.

"Iba anti-conversion law kübok Khristanpur 500 dak tema tepuokdak yua lir. Taküm kisüng nisung 250 jungnüa Khrista dak amangba atema tepuokdaki yoka lir," ta arogo lenirtemi ashir.

Police temi ken o tiazü benoker aser Deobarnü jurila kidang aser tekülem ki tila nung sarasademtsü adenshiba nunga tamangba yimsü melendaktsüba mapa inyaker ta jembir, ta pai ashi.

"India indang Supreme Court nung state indang anti-conversion law anema ken o benokba sülen ano lokti tila sarasademtsü adenshiba nung tenük yokba yimya tali kimogo," ta pai ashi.

Chichiba ozüng ya linük indang temaba okadak asadangba mapang süaka state sorkari 2024 küm iba ozüng ya yanglushia tashiyim amshia mesüra taila yimya amshia tamangba yimsü melendaktsüba atema küm 20 nungi arishi tepiyong tepuokdak ayutsü ozüng ya yanglua liasü.

Yanglushiba ozüng anema ken o benok, saka Supreme Court-i chichiba ozüng aser yanglushiba ya mamshi atatsü memela.

"Supreme Court nung

unconstitutional law ya shidak lir ta kuli sayutsü mechi anti-conversion law ya amshia Khristan nütsüng tila dak tenük yoker," ta Pastor Joy Mathew-i ashi.

Mathew ya Uttar Pradesh nung alir aser timtem balala ajurua aliba Khristanpur parnok ken o jembishinüba nung yarir, aser pai ashiba agi Bhayapurwa nung nisung 150 shi sarasademtsü adenshir.

"Anungji parnok tamangba yimsü melendaktsütsü meranger ta police temi tiazü kuli sayutsü meranger," ta pai ashi.

New Delhi nung aliba United Christian Forum indang convenor AC Michael-i ashiba agi, iba ken o ya yimtenren tsütsü nungi ajungmesoba amai ajiteter aser okadak takok mongutettsü.

"Tashiyim amshia tamangba yimsü melendaktsüba ken o dak sendakba nung tanü tashi India tesem balala nung aliba court kata nunga aitsüba mali," ta Michael-i ashi, shiba taoba mapang Delhi state minority commission nung züngsem liasü.

Uttar Pradesh nung 2024 küm Khristanpur anema mapa tamajung inyakba 209 liasü, koba Indian state nung timtiba liasü. Kasa mapang linük nung iba ama tatalokba 843 liasü, ta UCF ajanga ashir.

Uttar Pradesh nung nisung million 200 dak tema aliba nungi Khristanpur shilem ka dang tajemba aser timba Hindu yimsü sülen anidakertem lir.

## Sri Lanka nung küm 40 shi jakdang tepsetba putir asoshi obendang bushir

**Colombo, Yimpoksüi/Nov. 14 (Agencies):** Küm 40 jungnüa jakdang Sri Lanka nung Catholic putir aser social worker ka tepseter jangjatsü asoshi arogo lenirtem aser rights activists temi bushisüngdang tasen tenzüksü akhangher.

Father Michael Rodrigo ya arishi küm 60 asüdag Uva province kübok Buttala nung Holy Mass agidang mejangjaba nisung kati tonga arur injanga agi akha.

Putir Rodrigo tepseter küm 38 ajungba anogo pa tepsetba tesem nung Catholics, Buddhists aser right activists tem adenshir bushisüngdang tasen tenzüksü ya akhang.

Tesüiba küm 40 tsüngta sorkar balala melentepa linük yimsü süa arudang 'political reasons' mechi nisung tepseter jangjatsü akhangba senzuka yutsü ta parnoki ashi.

Yimten yimsüsüba yimya melenshiogo aser September 2024 nung communist-i aniba

sorkar mezüng tenteta aliba yagi Father Rodrigo tepsetba tanaben bushisüngdangtsü mapa lir, ta parnoki ashir.

Iba mapang aliba sorkari putir yagi nokdangher aliba leftist political party - Janatha Vimukthi Peramuna (National People's Power mesüra JVP) - bhukumer ta shia liasü, shirnoki tang linük nung yimsü asür.

"Father Michael Rodrigo tepseter tsüngsü pua merenshiba nungi tang aliba sorkar shingaia menokdangher, koba lesson ka asütsü aser tarutsü nung iba ama meinyakdaktsütsü," ta rights group Stand Together indang secretary Mary Welgama-i ashi.

Putir ya mitkari tepset, ta arishi küm 54 tain Welgama-i ashi.

Mitkar ketdangsür kati putir ya amokmerena liasü aser nokdanga aliba JVP indang youth wong nung dena lir aser timtem ajurutsü ta

tekumdangtsü shia liasü, ta lai ashi.

Badulla nungi Buddhist nunger Ruwan Attapattu-i ashiba agi, tebu aser par kinungertem aluyimer asoshi nokdakba nung iba putir den teka amteper inyaka liasü.

"Iba ya 'political murder' lir, kechiaser putiri makamaiter sensakser tem bhukuma nokdak aser iba mapa inyaker ajak okadaki bener arutsüla, merenshitsüla aser tatishitsü sayua tangsa bushisüngdang tenzüksüla," ta Attapattu-i ashi.

Welgama-i ashiba agi, putir-i Buttala nung shini company ka jashidakja iba factory anema pai nübурtem ayongten, koba ajanga süngdonglidong aser tzüpokdak tesemtem raksatsü aser yangji aliba aluyimer nem pei li magütsü.

Rodrigo tepsetba tesem ya tangbo temeshi tesem ka kumogo, kong November 10 nü pa asüba anogo nisung aikati semdangher.

## ANO GO ABEN TSÜNGREM DEN

### Shimtetba

*Ni Kibuba dang langka meshiogo.*

*T. Ken 27: 4.*

Dawidi pa taküm junga meteta liasü. Pai tejangraba ka dang ratettsü, aser ibaji pa asoshi ajak liasü. Pai aginüba ajunga agi arishi anogo tepiyong Kibuba kidang linübaji liasü.

Dawidi Kibubar kidang kishinüker ka danga sünüali ta ashi. Alima nung ki tajung yanglua yur taginütsü oset ajak madak kanga jangratema liaka, pai ibaji menükshi. Ashiko paia alima jangratemji junger ta bilemer südi, saka pai kanga aroka shisadangdang, ajak madak kibur kidang alitsüabajisa tajungtiba ta angatetba ajanga, pa taküm piyong Kibubar kidang dang linüa liasü südi.

Iba lima nung jangratema liaka kibur kiji metongtetra taküm piyong pa dak amangbaji amajok. Saka pa dak züngzünga amangrabang, iba lima nung jangratema lirang ano tarutsü lima nungjia teti tepela nung pa den jangratema alitsü. Kibuba kidangbo teti tepela dang, yangji mangyim jashi mali. Iba jagi pai iba Hon yimti nungji linüa liasü. Asenokia kibur kidang litettsü asoshi pa dak tsüngchia aser ochishia amangdi.

## 129 ABAM Küm Tatem Mungdang agiogo



**Dimapur, Yimpoksüi/Nov. 14 (TYO):** Ao Baptist Arogo Mangdang (ABAM) 129 Buba Küm Tatem Mungdang November 13 & 14, 2025 anogotem kanga takok ngua agiogo.

Mungdang nung ABAM tir Rev. Ayutemjen ajanga, tanela taküm tejangja yua tenzüka aser amanga libaliroba ajanga dang asenoki Tsüngremer sentong atalokdaktsütsü asünung asen koma alir aser inyaker kanga jangja meteta lidi, ta ayongzüik.

Ao Senden tir Marsanen ajanga tajungshi O agütsüba mapang, "Tsüngremi asen nüburnem samanir asütsü maongka tulu agüja lir. Asenokiang Pai mulungba nung lia inyakra, mapa aika nung samanir asütsü Tsüngremer maongka asen tsütsü lir. Anungji khen arok-aroka bilemdanga asen Aor alitsü mapang lir' ta ajungshia liasü.

Ao Laishiba adoker küm 50 ajungba nüngtem nung Lanur Laishiba adoktsü lemtetba ama Lanur Laishiba tajung ka adokba Rev. Dr. W. Along Jamir, Director, Translations Bible Society of India, Bengaluru ajanga mungdang nung sayatsü sayatsü. Iba ya Bible Society of India otsü

nung Lanur Laishiba adokba mezüngbuba lir.

2025 küm Music Ministry ajanga Ken mejemer tajungtiba asem nem sempet agüja liasü. Parnokji Tia Jamir, Sungkomen B/A; R. Lipok Aoyimti B/A aser I. Wati Aier Rongpangmen B/A alitsü.

November 14, 2025 nü arogotem aser ABAM drivertem asoshi sentong tajung ka ayonga agia liasü. Iba sentong nung nung Dr. Sunep Imchen, Director, AH & Veterinary Services, Govt. of Nagaland shisa len sayur liasü.

Iba mungdang nung 2026 ABAM omen "Tsüngrem Dang Sentsüwangshi" Gal. 1:5 asütsü lemtet.

ABAM tir asütsü Rev. O. Sashi Ozüküm, Pastor, KABA aser tatong-tir asütsü Rev. Talijungla APW, Ungma B/A shima liasü.

Maneni ABAM nung Union Baptist Fellowship (Fazl Ali College), Mokokchung; Senden Baptist Fellowship, Seithekema aser Asetti Baptist Fellowship, Merangkong agizüka liasü. Tang ABAM nung Arogo 170 aser Fellowship 19 alitsü.

Taküm iba ABAM Küm Tatem Mungdang nung Arogo 144 aser Fellowship 9 nungi nisung 1,113 dena liasü.

## AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

### Tsübu

(adj) temulung ilaa aküm, tasü mait aküm (fear)

\* Ammang nung tanurtem kanga tsüba liasü.

### Tsüdang

(v) lemdangtsü, ana kuma bendangtsü, alema ao (demarcate boundary, disrupt)

\* Ozü kena arr tsüdang yokba mapang, pai kü o tsüdanga jembi aser idangji onok jakdang shiruru ka tsüdanga ao.

## OLONG PAITEP # 7330

|    |  |    |    |    |    |    |    |    |    |
|----|--|----|----|----|----|----|----|----|----|
| 1  |  | 2  |    |    |    | 3  |    | 4  |    |
| 5  |  |    |    |    | 6  |    |    |    |    |
|    |  |    |    | 7  |    |    |    |    |    |
|    |  |    | 8  |    | 9  |    |    | 10 |    |
| 11 |  |    |    |    |    |    | 12 |    |    |
|    |  |    | 13 |    |    | 14 |    |    |    |
|    |  |    |    |    | 15 |    |    |    | 16 |
| 17 |  | 18 |    | 19 |    |    |    |    |    |
|    |  |    |    |    |    |    |    | 20 |    |
| 21 |  |    |    |    |    |    | 22 |    |    |
|    |  |    |    |    |    |    |    |    |    |

### TIPIEN

5. Ajunga  
6. Tebur dang yamai ajar  
8. \_ \_ \_ \_ ngshi  
10. Tsüngküm ozü ka  
11. Aika / Perir anüing  
13. Süngjang tako ka  
15. Mechinüi aküm  
17. Odaktsü  
19. Agütsüba memeshi  
21. Tesütep / Apet  
22. Tetsür tenbenjem mapang

### LANGTSÜNGLEN

1. Teyira  
2. A \_ \_ \_ gsang  
3. Arua mali / Matong  
4. Tema tereprangtsu  
7. Onsara / Alia  
8. Tulu masü  
9. Yimya-yimpong  
12. Ak alidak  
14. Yangi masü  
16. Kaket shilem ka  
18. Ayak aketba shiruru  
19. Meru \_ \_ \_ \_  
20. Kidongren telemsa

## OLONG PAITEP # 7329 TELANGZÜBA

### TIPIEN :

1. Kasa, 6. Rangben, 7. Mait,  
9. Poktet, 11. Ati, 13. Atasa, 16. Rür,  
17. Rajang, 20. Lanu, 24. Nüngjem,  
25. Sura.

### LANGTSÜNGLEN :

1. Khu, 2. Süjak, 3. Onük, 4. Oba,  
5. Anü, 6. Ratet, 7. Mozü, 8. Ita, 10. Tar,  
12. Tinu, 14. Salem, 15. Aja, 18. Anünü,  
19. Tajü, 21. Ano, 22. Onü, 23. Kua.

## NAI-A YA METETTER MA



**Australia nung bagpipers 374-i AC/DC ken ka atemba ajanga world record ka yanglutetogo.**

Victoria nung Great Melbourne Bagpipe Bash ajanga nisung 374 anidena "It's a Long Way to the Top (If You Wanna Rock 'n' Roll)" ken atem.

Australian rock band AC/DC-i 1976 nung original version film asüba tesem nungi tatsüka dang pilar Federation Square nung Great Melbourne Bagpipe Bash ajanga sentong ayonga agi.

## Zeliangrong Naga kaketshirtemi Unity March nung shilem agi

**Imphal, November 14, 2025**

**(Agencies):** Manipur kübok Noney District Headquarters nung kaketshir noklang aikati Sardar Vallabhbhai Patel sor küm 150 ajungba tenüing nung unity march ka nung shilem agiogo.

Manipur kübok Noney district nung Zeliangrong Naga nunger teimba ser lir.

Longmai Common Ground nungi tenzüka sentong ya

Longmai Noney Bridge nung tembang. Ek Bharat Atmanirbhar Bharat omen nung ajemdaker Sardar@150 Unity March agia liasü.

Iba sentong nung Iron Man of India, Sardar Vallabhbhai Patel nem naro yuja tetushi agütsü.

Iba unity march nung school balala nungi kaketshirtem, CSOs nungi volunteers, village authority members aser police

personnel-i shilem agi.

Sardar Vallabhbhai Patel küm 150 ajungba tenüing nung linük ajungalen Sardar@150 Unity March ayongzüka agir.

Sardar Vallabhbhai-i India longjemdaksüba nung tongti shilem agiba sayua Sardar@150 Unity March agir. Prime Minister Narendra Modi-i ayongzüka Viksit Bharat aser Atmanirbhar Bharat mission den iba sentong ya puteper.

## Zubeen Garg film tatembangba international screenings tenzüker



Garima Saikia Garg, aser production team ajungai merangba ajanga lir.

Külen, Assam nung police-i Lakhipur nung Rafiqul Islam puogo. Rafiqul-i pa indang YouTube channel "Rafiqul R Vlogs" nung film clips upload süa pirating asüba atema apu.

Pa Chief Judicial Magistrate's Court tsüingdangi anir ao aser anogo asemnü police ket nung ayutsü temelaba agütsü.

Iba ken o ya Bharatiya Nyay Sanhita, the Information Technology Act, 2000, Copyright Act, 1957, aser Cinematograph Act, 1952 kübok benoka lir aser Panbazar Cyber Police Station ajanga bushisüingdang südar.

Film sayaba sülen online nung unauthorised clips sayuba atema producer Gautam-i FIR ka benokba nung ajemdaker Rafiqul Islam apu.

Roi Roi Binali film ya October 31, 2025 nü India nung saya aser sen teimtiba aazükba Assamese film kümogo. Film sayar anogo 12 tsüingda Rs 16 crore aazükta liasü.

**Guwahati, November 14, 2025 (Agencies):** Zubeen Garg indang tatembangba film Roi Roi Binali atema November 15 nungi international screenings tenzüksü aser iba ajanga bendanglen alir

Assamese nunger atsür arutsü. November 15, 2025 nungi tenzüka Toronto, Canada, aser North Carolina, USA nung iba film sayutsü.

US nung November 16 nü Chicago (Illinois), Detroit (Michigan), Atlanta (Georgia), and in Austin aser Dallas (Texas) nung iba film sayutsü. December 7 nü New Jersey aser Boston nung special shows

alitsü aser December 8 nü San Francisco nung Bay Area screening asütsü sentong lir.

Maneni, December 13 mesüra 14 nung Seattle show atema jembitepdar aser January tashi nung Los Angeles screening asütsü merangdar.

Assamese film tem ya bendanglen sayutsü atema ita asem nungi trok tsüingda agir. Ajisüaka, Roi Roi Binali film ajanga record tasen ka yangluogo aser ibaji India nung film sayar anogo 15 tsüingda American theatres atongba lir.

Iba alizüng ya director Rajesh Bhuyan, producers Shyamantak Gautam aser

## Arunachal sorkari elections matongdang prangpong bendener

**Digboi, November 14, 2025**

**(Agencies):** Changlang Deputy Commissioner Vishal Sah (IAS)-i district nung licensed firearms ajak agütsütsü tetuyuba agütsüogo.

State Election Commission, Arunachal Pradesh-i November 3, 2025 nü election mapang prangpong tim mesüi amshiba noktangtsü atema state ajungalen mapa inyaksü tuyuba ama Changlang DC-i iba osang

metetdaksüogo.

SEC-i tuyuba ama Changlang district administration-i mapa akangakanga inyaksü tenzüko. Changlang district nung firearm licence holders ajaki nomination papers tatembang anogo matongdang anasatiba police station nung prangpongtem agütsütsü tetuyuba agütsü.

Police station nung officer-

in-charge shiai kuli tejanga bendena firearms bendena ayutsü shiogo.

District Magistrate-isa public dang "Khaza Banduks" dena yirutsü aketba hadirtem mebenshitsü tenokdangba agütsüogo.

Ajisüaka iba tenokdangba kübok police, defence forces, Central Armed Police Forces, aser tanga authorised security agencies madener.



Manipur police-i tanga security forces den yaritepa Kangpokpi aser Ukhrul district tem nung acre 65 nung poppy lu yima aliba raksatsüogo. Tenemlen aliba alutem nung farm huts 19, fertilizer bags 10 aser metsü bosta 9 tashi mi agi rongdoktsüogo ta ketdangsürtemi ashi. Committee Against Poppy Plantation, Zalenbung area-i November 5, 2025 nü Ukhrul district nung poppy lu ayimdang amshiba fertilizers aser osettem raksatsüba sülen Brihostibarnü police-i iba mapa inyak.



OFFICE OF THE

MOLUNGYIMSEN LAISHIR TELONGJEM

PO TULI TOWN-798618

TENÜNGSANG AGÜTSÜR

Rev. DR. R. Nüngshilepzük

S/O Late R. Lisen Ao aser Late Mrs. Kijakala MTBA nungi 21.9.25 Anogo nung, Aser Rev. Tianaro Jamir D/O Late Rev. Alemkaba Jamir aser Late Mrs. Imkonglemla Tzüdir BABA 26.10.25 Anogo nung ABAM Ordination Council ajanga, Aser Rev. Imsüpong Nokdir S/O Late M.Bendangmongba Nokdir aser Mrs Chubasenla DUBC United Baptist Church Association, NEI nungi 9.11.25 Anogo nung.



Par asemprongi Tsüngrem tenzüka wadang nung pei taküm bendanga aguja nendaka inyakba aser tatishitsü taküm liteta, Laishibai ashiba ama Sayutsünger 7:1"tenüng tajungji senti mozü dang tajungba asangsang nung iba Reverend jenjang ajangzüket nung asen Molungyimsen Laishir Telongjemi tenüngsang tulu agütsür, aser Teyanglur Tsüngrem tenüng tali asanger. Kibubai nenok taküm, kibong, wadang tali moajangma.

Sd/-  
Mr. Merangkaba  
(President MLT)

Sd/-  
L. Ajungla Aier  
(Secretary MLT)

## Ukraine nung Russia-i drone amshia amakba nung nisung pezü asü

**Kyiv, Yimpoksüi/Nov. 14 (Agencies):** Russian drone ka Kyiv anüdoklen apartment block telungi aitba mapang nisung pezü asü.

Ukraine yimtiba nung drones 430 shi aser missiles 18 shi khaloktsü aser ki talang aika raksatsü, ta Tir Volodymyr Zelenskyy-i ashi.

Kasa mapang danga regions aika nung maka liasü. Linük south tsütsü Chornomorsk nung shishilempaba tesem ka nung drone ka agi amakba nung nisung ana asü.

Ukraine-i yasüng Black Sea nung Russia nunger rongnendak Novorossiysk nung amak. Sheskharis oil refinery nung mi tulu adok aser rong ka aser apartment blocks nung kongshi, ta ketdangsüri ashi.

Krasnodar governor

Veniamin Kondratyev-i ashiba agi, ketdangsür asem aser nisung ka yiru aser iba mapang main oil depot aser container terminal raksatsü.

Yasüng Russia amakdang Ukraine-i "Long Neptune" cruise missiles khaloktsü, ta Tir Zelenskyy-i ashi.

Mayor Andrei Kravchenko-i state of emergency sangdongogo aser totzü ayokba anena lir ta osang ajanga ashi.

Kyiv yimti kübok district ajunga nung amai amak, ta yimti indang military administration tekolak Tymur Tkachenko-i Telegram nung ashi.

Pai Brehostibar aonung ayatirm süyir minute ka lir nüburtem dang tesem balala nung jenoktsü tekumdangtsü shia liasü.

Kyiv abelen ayongkum

nung aliba Lisovyi kiyong nung fire service ajanga ashiba agi, drone kati apartment block indang floor tenet buba nung kongshia apokba mapang floor ti buba nungi pezü buba tashi chirep, ta ashi.

Iba ki teraksa tsükba aser mi adokba ajanga apartment buildings kar, mozüki ka, school aser administrative buildings nung teraksatsüba agütsü, ta emergency services ajanga ashi.

Nisung 40 dak tema iba tesem nungi kumzüka liasü.

Kyiv indang energy infrastructure nung kanga mejungi kongshia ki kar nungbo tatsük agütsüba facility mali ta ketdangsür temi ashir.

Ukraine indang air force-ia Sumy densema danga region tem nunga drones aser guided bombs tem khaloktsü ta ashi.

## Ivory Coast-i arrtsü nung security akangshir

**Yamoussoukro, Yimpoksüi/November 14 (Agencies):** Kidanger Mali nungi refugee tem tali senoka aitba sülen Ivory Coast-i arrtsü nung security akangshiogo, ta ketdangsürtemi metetdaksü.

Ivory Coast indang National Security Council (NSC)-i sangdong ka ajanga ashiba agi, Mali anüotip len kiralongrar teloktemi civilian tem amakba ajanga refugee tem tali senoka aiter ama reprangteter.

"National Security Council-i Executive Secretary dang item tejenokdak bushirtem züngoksema ayutsü atema tenüngdakba jenjang ajak agitsü tetutyuba agütsüogo," ta kasa sangdong ajanga metetdaksü.

"Maneni Chief of the General Staff of the Armed Forces dang linük anüdoctip len arrtsü nung security

akangshitsü tetuyuba agütsüogo," ta NSC-i ashi.

Al-Qaeda den sendaktepa aliba Jama'at Nusrat al-Islam wal-Muslimin (JNIM) telok yagi küm ter shi Mali sorkar anema rara arudar.

Iba telok ya 2017 küm tentet aser Africa anüolen timba inyaksangshir. Islamic Maghreb, Ansar Dine, Macina Liberation Front aser al-Mourabitoun telok al-Qaeda den longjemba sülen iba telok tenteta liasü.

JNIM ya Mali nung tama inyaksangshi tenzüka saka tangbo kidanger Burkina Faso, Niger, Ghana, Ivory Coast, Benin aser Togo nunger ajaki prokshiaogo.

Taoba October ita iba telok yagi mezüngbuba Nigeria maka sepai ka tepset aser injang den sen auyar oa liasü.

2017 küm nungi tang tashi

nung iba telok yagi nisung meyirejang aika tepsetogo.

JNIM-i Mali nung yimsüsüba melenshidaksüner aser bendangertem dang military sorkar den parnok nungi temelaba magi shishilemba masütsü tekümdangtsü metetdaksüogo.

Sensaksemtsü atema military sorkar nongshitsü atema JNIM-i September ita tanker temi amshiba highway tongtibatangtem shibanga ayu aser Ivory Coast aser Senegal nungi Mali tonga aotsü merangba totsü abenba truck tem anema jenjang agia liasü.

Bodhbarnü JNIM telungpurtemi Ivory Coast arrtsü nungi km 50 shi pilar aliba Loulouni jila amakba sülen nisung noklang aika jenshia liasü.

Ivory Coast nung kidanger Burkina Faso nungia refugee 90,000 shi jenoka lir.

## Bangladesh nung Hasina'er party-i mepetmesü adokdaksür

**Dhaka, Yimpoksüi/November 14 (Agencies):** Sorkar mapa nungi atsüngtoker aliba taoba Ato Kilonser Sheikh Hasina anema okadak obendang ka magütsü tsünga Bangladesh nung lendong aika ataloka arudar. Lar party-i iba ken o anema linük ajunga mokdanga ayutsü ayongzüko.

Linük yimtiba Dhaka aser tanga tongtibatang yimtittem nung school tem Mongolbarnü online ajang dang agia liasü. Tesem balala amakba sülen gari senzügenpong nung tetsükdaksü adokba ajanga iba jenjang ya agia liasü.

Tensa mejungi akümba mapang linük ketdangsürtemi Bodhbarnü crude bomb 32 apokba mangaoka lir aser tesem balala nung bus aika rongtoktsüogo.

Ajisüaka nisung asüba osangbo kecha mali aser Brehostibar aonunga Dhaka airport anasa crude bomb ana pokdakja liasü.

Nobel Peace Prize laureate Muhammad Yunus-i aniba interim sorkari security akangshiogo aser linük yimtiba kübok tesem balala meita atatsü atema paramilitary Border Guard nungi sepai 400 yokogo.

Kasa mapang nung

checkpoint tem akangshiogo aser lokti tulu adenshitsü tenokdangba agüja arudar.

tawa lendong balala atalokba rongnung Gopalganj district (Hasina'er ki) nung sorkar office ka nung mi bomb ka mereploktsüba densema lir. Local media-isa, Bangladesh anüdoklen Yunus-i ngutetba Grameen Bank Bodhbarnü rongtoktsüogo, ta metetdaksü.

Police-i, bomb pokdaksüba aser kiojen raksatsüba nung densema aliba Hasina-i aniba Awami League party pusemertem aika puogo.

Hasina shibai taoba küm August ita linük nung sorkar anema longkak aitba mapang India-i jena oa liasü, la meliaka lai meimchir temeden anema jenjang agiba atema aija obendangdar. Lai la kecha nunga aibelena mali ta shia arudar aser ajak ya yimden yimsüsüba dak sendaka lir ta shiogo.

Arishi küm 78 tain lenir ya taoba küm Bangladesh security forces-i azütokshia longkak aitertem azüokba atema aitsüogo.

Taoba küm mepetmesü tulu adokba mapang nisung 1,400 tepset ta United Nations-i metetdaksüogo.

## US aser South Korea nati nuclear poweerer submarines yanglutsü

**Seoul, Yimpoksüi/Nov. 14 (Agencies):** United States aser South Korea nati trade agreement tejangja lemsatepogo, kong US rong yangluba sector nung Korea-i sen \$150bn indoktsüba aser linük anaprongi nuclear-powered submarines yanglutsü mulungtepba dena lir.

Iba agreement kübok South Korea-i Washington den rong yangluba, artificial intelligence aser nuclear industry nung partnership tasen ka ama nuclear-powered submarines yanglutsü, ta South Korea Tir Lee Jae Myung-i Hokulbarnü ashi.

White House ajanga sangdong ka agütsüba nunga Seoul-i nuclear-powered submarines yanglutsü asoshi US-i temelaba agütsüogo aser South Korea-i rong yangluba nung sen \$150bn indokba den külemi US industrial sectors nunga sen \$200bn indoktsü, ta shia liasü.

Korea nunger oset nung tariffs shilem 25 meshia aliba shilem 15 kumtsüba mechi Seoul-i iba investment mapa inyaker, ta South Korea sorkar meyong Yonhap news agency ajanga ashi.

"Asen rongsenketzüng aser security tsütsü temelenshi malitsü tulutibaji linük ana tsüngta shishilempaba, tariffs aser security indang jembishinüba ya lir, koba tembangogo," ta Tir Lee-i Hokulbarnü osangbener senden

ka nung ashi.

"Nuclear-powered attack submarines yanglutsü atema United States-i ROK (Republic of Korea) nem temelaba agütsüogo," ta Lee-i ashi.

Uranium enrichment aser spent-fuel reprocessing madak asen tashi ulushitsü atema teyari ngutetogo, ta pai ashi.

US shishilempaba nung amshiba rong aser rara nung amshitsü US military vessels timba kumdaktsütsü atema "shipbuilding working group" ajanga linük ana teka amteper tali inyaktsü.

South Korea yagi 2030s tiyonglen tashinung 5,000-ton conventionally armed, nuclear-powered submarines pezü mesüra tali alitsü meranger.


South Korea indang nuclear-powered vessels yangluba ajanga par tzüyim sepai aser defence industries nung tashi kanga itshitsü aser iba ama tashi aliba linük teshimtet ishika rongnung Seoul ya adentsü ta ashir.

Nuclear submarine technology atema Washington-Seoul tezüngzüktep agiba atema China-i tebilemtsü akaba lemsatepa lir.

North Korea nungi sangdong kecha agüja mali saka telangzüba agütsütsü amai lir.

Künü anogobo amaktsü terenemshiba nung North arütsülen Washington aser Seoul nati mitkar tashi ulushir ta Pyongyang-i tai tonglokja arur.

## Asian Archery Champ's nung India tebur recurve team-i gold angu



**Yimpoksüi/November 14, 2025 (Agencies):** Hokolbarnü Bangladesh yimtiba Dhaka nung Asian Archery Championships final nung India tebur recurve team-i Republic of Korea koka gold medal nguogo.

India team-i iba asaya ya 5-4 ta tera agidang koka liasü. Team anapronglai point 29 anguba sülen shoot-off ka asaya, aser India nunger asayar Rahul-i akhaba arrow center anasatiba asüba agi parnoki asaya koka liasü.

India team nung Atanu Das aser Rahul na ya Reliance Foundation-i nongita yarir.

2007 küm sülen tang mezüngbuba India tebur recurve team-i iba asayamung nung gold medal nguogo. Korea team ya 2013 küm nungi khen danga tamakok mongui asaya arua liasü.

Brehostibarnü kasa asayamung nung Jyothi Surekha Vennam-i anir India nunger compound archer temi kanga junga asaya-a gold asem aser silver ana ngua liasü.

Jyothi-i tetsür kija asaya den külemi team asaya nung gold medal angu.

Lai mezüngbuba Deepshikha aser Prithika Pradeep na den külemi compound tetetsür team final nung Korea team 236-234 agi koka liasü.

Iba sülen Asian Games champion yagi compound tetsür kija asaya nung külem India tsür arishi küm 17 tain Prithika 147-145 agi koka liasü.

Jyothi-i semifinal nung point ka dang monguteti Chinese Taipei nunger asayar Si-Yu Chen 149-143 agi koka liasü.

Kasa mapang nung Prithika-i tanga semifinal ka nung Kulsum Akhter Mone 146-145 agi koka liasü.

Compound mixed team final nung Abhishek Verma aser Deepshikha nati kanga junga asaya aser Bangladesh team 153-151 agi koka ano India atema gold medal ka angu.

Ajisüaka compound tebur team final nung India team-i 229-230 ta point ka agi Kazakhstan mekoki silver dang ngua liasü.

India team nung Abhishek Verma, Sahil Rajesh Jadhav, aser Prathamesh Bhalchandra Fuge nunger ya Kzakh team nung Dilmukhamet Mussa, Bunyod Mirzametov, aser Andrey Tyutyun nungeri akok.

## Sumit Nagal nem China Visa agütsüogo



**Yimpoksüi/November 14, 2025 (Agencies):** India nunger tebur tennis asayatem rongnung temaba jenjang nung alisang Sumit Nagal, Australian Open Playoff nung shilem agitsü atema China-i aotsü asoshi visa nguogo. Iba asayamung ya Chengdu nung November 24 nü nungi tenzüka asayatsü.

"Ni visa mapang shitak

nung angutsü atema teyari agütsüba asoshi @Media\_SAI, @ M E A I n d i a , @China\_Amb\_India and @ChinaSpox\_India dang kanga pelar," ta pai Brehostibar aonung ayaterem nung X nung post sütsü.

Jhajjar, Haryana nungi arishi küm 27 tain asayar yagi pa indang visa application kuli kecha magütsüi magizükba

sülen Chinese Embassy dang pa yaritsü mepeshia liasü.

China Foreign Ministry otongdar Lin Jian-i ashiba agi, China-i temzüng ozüing dak ajemdaker India densema linük ajak nungi asayatem nem visa agütsür. Paisa, ken o dak sendaka alisangi takaratiba nung Chinese Embassy nem tenüngdakba kuli kakat ajak agütsütsü imlaba lemsatapa liasü.

Iba asayamung ajanga regional asayatem nem 2026 Australian Open main draw nung asayatsü atema maongka agütsür.

Nagal ya tang ATP rankings nung 275buba nung lir. Pa top 100 nungi tugatoker asünung Grand Slam nung asayatsü atema wild cards mesüra qualifying round tem dak metaloker lir.

Taoba küm Nagal Australian Open main draw nung asaya saka mezüngbuba round nung tsükatok. Pa Roland Garros aser Wimbledon nunga qualifiers nung tsükatok.

Iba küm tetenzüklen India team-i Davis Cup nung Switzerland akokba mapang Nagal-i tongtibang shilem agia liasü.

## Carlos Alcaraz World No. 1 ama küm tembangtsü



**Yimpoksüi/November 14, 2025 (Agencies):** Turin nung tang asaya aliba ATP Finals nung Carlos Alcaraz-i Brehostibarnü 6-4, 6-1 agi Lorenzo Musetti akokba sülen pa taküm world No 1 jenjang nung küm tembangtsü.

Alcaraz-i taküm Grand Slam ana tashi kokogo aser Musetti akokba sülen Hombarnü rankings sayaba nung pai Sinner ajateta temaba jenjangi atutsü. Iba asaya akokba ajanga pa iba asayamung nung Jimmy Connors Group nung temaba jenjangi tuogo.

Alcaraz shibai taküm asaya 70 kokogo, pai Honibarnü semifinal makokyonga pa 2025 küm ya temaba jenjang nung tembangtsü. Sinner-i iba asayamung kokaka pai Alcaraz memeneptsü.

"Tema jenjang nung küm tembangtsüji kü nükjiding rongnung ka lir aser iba atema pelar," ta Alcaraz-i ashi.

"Küm tenzükdang number one jenjang ya talang ka nung lir ama bilem, kechiyong Jannik-

i pa asayaba asayamung ajak amai koka liasü.

"Season tepeyong takok aser tamakok mapang ajak anogoshia meranga inyakogo aser iba atema ni kūsasa aser ozü team atema kanga nema danga bilemer," ta pai ashi.

Alcaraz-i taküm Sinner den ponguben asayaba pezübenbo kokogo, kong Grand Slams ana densema lir.

Arishi küm 22 tain asayar yagi June ita Sinner den tennis asaya puti otsü nung asaya tajungtiba ka koka French Open title aben, saka Wimbledon final nungbo Italy nunger asayar ya makok.

Alcaraz den külemi Alex de Minaur-a semifina-i iogo. Pai Taylor Fritz, 7-6 (7/3), 6-3 agi akokba sülen semi tongtetogo. Semifinal nung pa Sinner den asayatsü.

Hard court specialist De Minaur-i taküm hard court nung asaya 43 kokogo, koba tebur tour nung asayar kati hard court nung asaya timtiba akokba asütsü.

## Lakshya Sen Japan Masters semifina-i iogo

**Yimpoksüi/November 14, 2025 (Agencies):** India nunger badminton asayar Lakshya Sen-i Hokolbarnü USD 475,000 Kumamoto Masters Japan nung Singapore nungi taoba mapang world champion Loh Kean Yew straight-game nung koka semifinal tongtetogo.

Commonwealth Games champion Sen, shiba iba asayamung nung seed tenetbuba asayar lir pai quarterfinal nung kanga junga asaya-a world No. 9 Loh ya 21-13, 21-17 agi minute 40 nung koka liasü. Sen-i pa indang career nung Singapore nungi asayar den ya terben asayaogo aser tenetbenbo kokogo.

Hong Kong Open nung tanabuba jenjang tonga asayaba aser Denmark aser Hylo Open nung quarterfinal tonga masaya tsüingda Sen asayamung aika nung junga masayateti aruogo, saka tang pa tajungba asaya tenzükogo aser iba asayamung semifinal nung pa Japan nunger

sixth seed aser world No. 13 Kenta Nishimoto den asayatsü.

Hokolbarnü quarter final asaya nung tena 4-4 ta kasasa liasü saka break tashi nung Sen 11-8 agi tejdakdang aküm. Iba sülen pai point trok atonga angu aser 18-9 agi pa tejdakdang akümba sülen asaya ayong ayonga koka liasü.

Tanabuba asaya nung Loh-ia kanga tashi ita asaya aser tena 9-9 ta point kasasa liasü. Ajisüaka Sen-i maneni tajungba asaya pa 15-9 agi tejdakdang aküm. Loh-i Sen menepa tua point 17-18 aküm saka pai asaya mekoktet.

Quarterfinals nung Sen-i Singapore nunger asayar Jia Heng Jason Teh straight-game nung koka semifina-i ai, saka India nunger asayar HS Prannoy bo tsükatok.

Sen-i world No. 20 Teh ya 21-13, 21-11 agi minute 39 nung dang ayong ayonga akok, saka Prannoy bo Denmark nunger asayar Rasmus Gemke-i 18-21, 15-21 agi koka liasü.

## BILEMDANGANG

"Tekolok tajung alibaji tongtipang masü, junga amshibaji tongtipang."